

23. apr. 2015

Naalagaaffiit Peqatigiit meeqqat pillugit isumaqatigiissutaata ilanngunneqarnissaa pillugu kingusinnerpaamik 2016-imi ukiakkut ataatsimiinnermi Inatsisartut inatsisaattut siunnersuuteqaqullugit Naalakkersuisut peqquneqarnissaannik Inatsisartut aalajangiiffigisassaattut siunnersuut.

(Inatsisartunut ilaasortaq Aaja Chemnitz Larsen, Inuit Ataqtigiit)

Inatsisartut suleriaasianni § 33 naapertorlugu aalajangiiffigisassatut Aaja Chemnitz, Inuit Ataqtigiinneersup siunnersuutaa Siumumiit imak oqaaseqarfigissavarput.

Siumup pingaartittuarsimavaa meeqqat inuusuttullu inuunerannut pitsanngorsaansamik anguniagaqartuarnissaq. Malitsigisaanillu pingaaruteqartuaannarsimavoq nunatut ineriartortutut siunnerfeqarnitsinni meerartatta inuunerannut oqilisaaqataanissamik tikkussiffeqartuarnissaq.

Meeqqat Pisinnaatitaaffii pillugit pimoorussiumaneq ukiuni kingullerni 22-ni ineriartorfiusimavoq. Tamatumalu suli malunnaatilimmik ingerlaavartumillu inerisarneqartuarnissaa Siumumiit peqataaffigiumallugulu pitsanngorsaavigiumavarput. Pingaaruteqarluinnartuuvoq meerartagut inatsisitigut illersugaanerisa qaffasinnerpaaffimminiittuarnissaat. Pisussaaffik tamanna inuiaqatigiinni tamatta akisussaaffigaarput.

Meeqqamik sumiginnaasarneq akuersarneqarsinnaanngilluinnarpoq. Akiuiniarneq annertoq, suliniutillu arlaqalereersut ilisimariikkagut maannamut ingerlareersimapput. Taamaattorli malunnarpoq ukiuni arlaqalereersuni meeqqamut illersuiniarnermut inatsisit ilaatigut suli inerisarneqaqqittariaqartutut isikkoarput.

Meeqqat Pisinnaatitaaffii tamakkiisumik atorneqannginnera ajuusaarnartumik suli naammattoorneqartarpoq. Taakkuuppullu maani inersuarmi Naalakkersuisut peqatigalugit iluarsiniagassavut, naapertuuttumillu inissitassagut. Nalilersueqqinnissaq piffissamut qaninnerpaami suliarineqarnissaa naapertuulluinnartuuvoq. Siunissami qanittumi danskit Naalagaaffiit Peqatigiit Meeqqanut Ataatsimiititaliaanut nalilersuinissaat Naalakkersuisutta peqataaffigisussaavaat, tamanna isumalluarnartuullunilu qilanaarutissaavoq.

Nunat Avannaamioqatigiinni malunnarpoq meeqqanut illersuinerup maannamut inerisarneqarnerisigut inatsisitigut illersugaanerat suli pitsanngoriartortoq. Tamanna Siumumiit taperserluinnarparput aamma peqataaffigiumallugu ammaffigiuartussaallutigu ilisimavarput. Sutigut tamatigut malitseqartitsineq pitsaasumik inerititaqarfiusartooq nalunnilarput, tamannaavorlu susassaqarfinni tamani suliffinni, meeqquerivinni, atuarfinni, Kommuneni aammalu politikkikkut nammaqatigiilluni illersugassaasoq pingaaruteqarluinnartooq.

Namminneq piumassutsiminnik peqatigiiffiit meeqqanut illersuinermit anguniagarlutik suliniutillit taakkuupput sakkussanik tuniorartuagassat, ikorfartoqatigiinneq napassutaammat tamanut nakooqutaasoq, taamaattumik Siumumiit tapersersuinerput tassuunakkut takutikkusupparput.

Siumumiit taama oqaaseqarluta Nunatsinni Meeqqat Pisinnaatitaaffiini nalilersueqqinnissamut atatillugu Naalakkersuisut allannguutissatut siunnersuutaat kingusinnerpaamik Inatsisartut 2017-mi

upernaakkut ataatsimiinnissaannut nalunaarusianngorlugu saqqummiunneqarnissaa Siumumiit
taperserparput.